


# **Vischnaunca da Medel/Lucmagn**



**Lescha da sepultura e da santeri  
per la  
vischnaunca da Medel/Lucmagn**

## **I. Determinaziuns generalas**

---

### **Art. 1 Basa**

<sup>1</sup> Sin fundament dil regulativ cantunal concernent ils fatgs da sepultura dils 14 da mars 1977 relai la vischnaunca politica da Medel questa lescha davart il satrar ed igl uorden santeri.

<sup>2</sup> Aschilunsch che questa lescha prescriba nuot auter, valan las determinaziuns dallas ordinaziuns federalas e cantunalas.

### **Art. 2 Intent**

Il santeri ei proprietad dalla vischnaunca e survescha al davos ruaus terrester dils defuncts. Perquei duei il santeri vegnir tenius da tuts en duida honor.

### **Art. 3 Survigilanza e cumpetenzza**

La suprastonza communal survigilescha l'execuziun ed interpretaziun da questa lescha e decida tuttas damondas che pertuccan igl uorden santeri.

## **II. Uorden da sepultura**

---

### **Art. 4 Liug da sepultura**

<sup>1</sup> Il dretg da schar satrar en santeri communal han:

- a) tuts domiciliai en vischnaunca;
- b) tut quels ch'ei morts sin territori dalla vischnaunca;
- c) cun lubientscha dalla suprastonza communal:
  - burgheis da Medel che habiteschan ordeifer;
  - defuncts che han il giavisch da vegnir satrai en la vischnaunca da Medel.

<sup>2</sup> Sin giavisch dil defunct ni da sia parentella sa la suprastonza communal era lubir la sepultura sin in auter santeri public.

### **Art. 5 Preparativas da sepultura**

L'administraziun communal ordinescha la preparaziun dalla fossa e pren en cass specials sco per exempel en cass da baras anfladas senza survivents tut las ordinaziuns per la sepultura.

## **Art . 6 Caplutta da morts**

Per postar las baras stat la caplutta da morts a Platta a disposiziun.

## **Art . 7 Temps da satrar**

Las sepulturas e las cremaziuns astgan succeder sil pli baul 48 uras e dueien haver liug sil pli tard 72 uras suenter la spartida dil defunct. Cass specials basegnan ina lubientscha excepziunala dil miedi districtual.

## **Art. 8 Prestaziuns dalla vischnaunca**

Tier las sepulturas organisescha la vischnaunca:

- a) la publicaziun ufficiala;
- b) il cavar e cuvierer la fossa;
- c) la rama ed il crap dalla fossa en crap artificial;
- d) il tschentar la rama ed il crap dalla fossa.

## **Art. 9 Taxas da sepultura**

Per cuvierer ils cuosts incassescha la vischnaunca las suandontas taxas:

- a) per ina persuna tenor art. 4 lit. a fr. 500.—
- b) per ina persuna tenor art. 4 lit. b, c fr. 1'000.—

## **III. Uorden santeri**

---

### **Art. 10 Register da fossas**

La vischnaunca meina in register dallas fossas che cuntegn la numera dalla fossa, num e prenum dil defunct ed il datum dalla sepultura.

### **Art. 11 Partiziun dil santeri**

<sup>1</sup> Il santeri ei dividius en secturs. Ei vegn satrau en retscha conform al plan dil santeri. Quei vala era per urnas.

<sup>2</sup> Sin giavisch dil defunct u dalla parentella sa ei vegnir lubiu da suterrar urnas en ina fossa occupada ni da suterrar pliras urnas en la medema fossa. Igl oriund ruaus da fossa vegn buca prolungius cheutras.

## **Art. 12 Ruaus da fossa**

<sup>1</sup> Il ruaus da fossa munta 20 onns per sutterradas e per fossas d'urna.

<sup>2</sup> Vegnan fossas dismissas suenter la spiraziun dil ruaus da fossa sto eventuala ossa aunc existenta ed urnas vegnir satradas dignamein.

<sup>3</sup> Cruschs e monuments dallas fossas cavadas si ston vegnir allontanadas ord santeri enteifer in meins suenter la visada ufficiala.

<sup>4</sup> Vegn ei buca dau suatientscha a quella ordinaziun lai la vischnaunca allontanar ei cun adossar ils cuosts als parents.

## **Art. 13 Exhumaziun**

<sup>1</sup> L'exhumaziun d'ina bara avon la spiraziun dil ruaus da fossa ei scumandada.

<sup>2</sup> Per excepziuns ei il departament cantunal da giustia, polizia e sanitad cumpetents.

## **Art. 14 Profunditad dalla fossa**

La profunditad minimala dalla fossa munta:

- 1.50 m tier fossas per carschi;
- 1.20 m tier fossas per affons;
- 0.80 m per urnas.

## **Art. 15 Qualitad dils vischals**

Per sutterradas eis ei da duvrar vischals da lenn lom. Ei la bara tier il vischi da lenn aunc enzugiada d'ina folia da metall ni da plastic, eis ei da procurar cuort avon la sutterrada a moda convegnenta che aria sufficienta hagi access alla bara.

## **Art. 16 Cruschs-fossa e monuments**

<sup>1</sup> Ei sto vegnir tschentau ina crusch sin fossa.

<sup>2</sup> Cruschs-fossa ston esser da fier zincau e patinau. Cruschs da ghisa ein buca lubidas.

## **Art. 17 Mesiras**

<sup>1</sup> Cruschs-fossa astgan haver la dimensiun da 1.00 m – 1.30 m altezia inclusiv postament.

<sup>2</sup> Igl ei buca lubiu da postar plattas sin la fossa che cuvieran l'entira fossa.

## **Art. 18 Inscriziun**

<sup>1</sup> L'inscripziun sto cuntener num, prenum, onn da naschientscha ed onn da mort dil defunct.

<sup>2</sup> Tuttas inscripziuns han da succeder en lungatg romontsch.

## **Art. 19 Manteniment dallas fossas**

<sup>1</sup> Ils parents dils defuncts ein obligai da mantener las fossas en digna fuorma e pietad.

<sup>2</sup> Vegn quei tralascchau sa la suprastonza communal prende las mesiras necessarias.

<sup>3</sup> Igl ei scumandau da plantar plontas e caglias sin las fossas, aschilunsch che quei ha consequenzas surproporzionadas sil contuorn.

<sup>4</sup> Sin giavisch sa il manteniment da fossas vegnir surdaus alla vischanunca encunter ina indemnizaziun fixada dalla suprastonza communal.

## **IV. Determinaziuns finalas**

---

### **Art. 20 Sancziuns**

<sup>1</sup> Surpassaments da questa lescha vegnan puni cun castitgs entochen fr. 1'000.—entras la suprastonza communal.

<sup>2</sup> Vegnan cruschs eregidas encunter las prescripziuns dalla lescha, ordinescha la suprastonza communal da midar ni spazzar ils indrezs.

### **Art. 21 Dretg da recuorer**

Encunter decisiuns e disposiziuns dalla suprastonza communal san ins recuorer enteifer 20 dis alla Dertgira administrativa dil cantun Grischun.

## **Art. 22    Approbaziun e vigur**

Questa lescha ei vegnida approvada dalla radunonza communal dils 9 da november 2000 e passa immediat en vigur.

La presidenta communal:

Il canzlist communal:

Anna Bundi-Pally

Valentin Pally